

# UN MILITAIR TEHUIS PA TUR E MILITAIRNAN NA ARUBA?

**ORANJESTAD, 3 april. —** Ds. J. Sepmeijer, „hoofd-vlootpredikant“, kende lo haci un bishita di inspeccion te dia 11 di april na Antillas, na e mariniernan, a bisa ayera mainta ora cu e tabata bai for di Aruba, cu aki ya ta existi plannan pa elimina e „militaire tehuisnan“ cu tin na e momento y pa traha un „tehuis“ henteramente nobo pa tur e mariniernan di Aruba den cercania di haaf na Oranjestad. Na Hulanda e organisacion Oost en West a worde acerca cu un proposicion pa financia e trahamento di e edificio aki, cu lo costa mas o menos 240.000 florin. E organisacion Oost en West kende tin e percuracion di e Protestantse Militair Tehuis na Savaneta y e Rooms Katholieke Centrale voor Militaire Tehuizen. E decision tocante e asunto aki lo tuma lugar na un reunion conhunto di Oost en West y R.K. Centrale.

Ds. Sepmeijer a haci e declaracion aki den presencia di e vloot-aalmoezenier di mas bieuw na Antillas pater E. A. J. Kamerbeek, ds. C.A. Mettingh Van Rijn y pastoor N. Erkamp di Oranjestad.

Tambe nos a worde informa, cu e plan pa cambia e systema di e militaire tehuizen na Aruba ta un iniciativa di e commandant di Marinierskazerne na Aruba, majoor G.C.J. Ballieux, kende ora cu seis luna pasa el a yega for di Hulanda na Aruba, mesora a mira cu e situacion na e momento no tabata completo. E R.K. Militaire Tehuis, con bon cu e intencion tabata, no ta bon situa na San Nicolaas, mientras cu e Protestant Militair Tehuis banda di e entrada di e kazerne, no ta duna e mariniernan e idea cu nan ta henteramente for di kazerne. Conbersacionnan a worde teni cu diferente personanan y e directiva di e tehuisnan na Aruba pa hanja un idea kiko nan ta pensa di e plan, pa traha un tehuis henteramente nobo pa tur e mariniernan sin destincion di religion of rang. Ora cu a resulta cu e directivanan tabata aprecia e idea aki, decisionnan mas concreto a worde tuma. E dos instancianan menciona di Hulanda a worde acerca, despues cu un lugar a worde hanja banda di haaf y e gastonan a worde calcula, pa duna nan yudanza financiero na e plan aki. Na Aruba un comitee di trabao a worde funda, y tin como presidente senior L.C.M. Kerstens, cu a keda stimula e plan. Ora a parce cu e plan lo a caba na nada pa motibo cu R.K. Centrale na Hulanda a declara di no tin manera pa yuda suficiente, e luchadornan na Aruba pa e plan aki, a bin den accion atrobe. Vice-admiraal Moorman, kende ta miembro di 2e. Kamer, a worde acerca pa duna su apoyo pa e iniciativa di Aruba, mientras cu kardinaal Alfrink y minister Algera a hanja peticionnan mescos. E kardinaal a contesta basta liher y a duna di conoce cu e ta aprecia e plan masha y cu e lo haci su esfuerzo na

Hulanda. Kier meen cu awor tin di spera ariba e resultado di e reunion di Diamars despues di Pascu Grandi, unda e decisionnan definitivo lo worde tuma. Den circulonan cu tin algo di haci cu e militarnan na Aruba, ta worde spera cu e desicionnan lo ta favorable, pa motibo cu nan ta sopena cu door di trahamento di un militair tehuis nobo e posibilidadnan di recreacion lo drecha mucho mas pa e militarnan. Expertonan ariba e tereno aki a duna di conoce cu ta mas responsabel pa traha un militair tehuis nobo na Antillas, cu den hopi lugarnan na Hulanda, pa motibo cu na Antillas uso ta worde haci hopi mas di e militaire tehuisnan.

## Savaneta

Si e plannan nobo worde acepta, e intencion ta pa sera e R.K. Militaire Tehuis na San Nicolaas y pa laga e tehuis na entrada di e kazerne sigui existi como un cantine pa e mariniernan.